

# KERATAN AKHBAR

---

TARIKH : 14 NOVEMBER 2022

AKHBAR : BERITA HARIAN

MUKA SURAT : 32

## PETRONAS perkukuh pengurusan pelepasan metana

### PETRONAS perkukuh pengurusan pelepasan metana

PETRONAS komited untuk mengukuhkan pengurusan pelepasan metana, serta usaha penyahkarbonan dan meningkatkan penyelesaian tenaga yang lebih bersih melalui pakatan baharu pada Persidangan Perubahan Iklim Pertubuhan Bangsa-Bangsa Bersatu (PBB) atau COP 27 yang sedang berlangsung di Sharm El Sheikh, Mesir.

Syarikat minyak nasional itu mengumumkan 'keahlian pendaratanganan' kepada Program Alam Sekitar PBB (UNEP), Oil and Gas Methane Partnership 2.0 (OGMP 2.0), serta pakatan global untuk Penyahkarbonan Industri, International Renewable Energy Agency's (IRENA).

"Keahlian ini menandakan usaha kami untuk ketelusan yang lebih tinggi dan memacu ke arah penyahkarbonan serta meningkatkan penyelesaian tenaga yang lebih bersih sejajar dengan aspirasi kumpulan untuk mencapai Pelepasan Karbon Sifar Bersih menjelang 2050 (NZCE 2050) bagi memenuhi matlamat Perjanjian Paris.

"Keahlian dalam perikatan itu adalah sebahagian daripada usaha syarikat untuk menyokong sasaran Rancangan Malaysia ke-12 bagi meningkatkan kapasiti tenaga boleh diperbaharui, serta menyumbang kepada komitmen iklim negara untuk mengurangkan intensiti karbon seluruh ekonominya (berbanding KDNK) sebanyak 45 peratus pada 2030 berbanding tahap pada 2005," kata PETRONAS dalam satu kenyataan.

Menurut kenyataan itu, OGMP 2.0 ialah program pelaporan dan mitigasi minyak dan gas metana UNEP untuk industri minyak dan gas, yang menyediakan rangka kerja pelaporan antarabangsa yang komprehensif, berasaskan pengukuran untuk sektor itu.

Syarikat ahli OGMP 2.0 mewakili lebih 30 peratus pengeluaran minyak dan gas global di lebih 60 negara, serta lebih 20 peratus saluran paip penghantaran dan pengedaran gas asli global, 10 peratus kapasiti penyimpanan global, dan hampir 15 peratus daripada terminal gas asli cecair (LNG) global, katanya.

Kumpulan itu berkata, rangka kerja itu secara sistematik akan meningkatkan pendekatan PETRONAS terhadap pengukuran pelepasan metana, kuantifikasi, pelaporan dan pelaksanaan usaha penyahkarbonan.

Sementara itu, menyedari kepentingan ketelusan dalam mengurus risiko berkaitan iklim dan membuka peluang baharu, PETRONAS menyertai pakatan global untuk Penyahkarbonan Industri, bersama IRENA dan syarikat global lain merentasi sektor industri.

BERNAMA